

就目前以證實相正是指示佛之知見也故
放白毫一光即見東方五百萬億恒沙國土
諸佛等者示五道衆生皆住諸佛一真之地
也見諸佛菩薩為衆說法者示衆生動亂妄
想即諸佛菩薩恒演法音也光中不現衆生
生死三乘求道等事者以今直證法身以名
教菩薩法故不言其餘種種也今說十方諸
佛皆釋迦之分者然佛有三身乃從法垂報
從報垂化今示三身一體意顯釋迦即多寶

分身即釋迦法化冥一之象也所謂佛身充
滿於法界普現一切群生前隨緣赴感靡不
周而恒處此菩提座今分身齊集共證妙法
以顯十方諸佛道同古今一際釋迦所說真
實不虛意顯無邊刹境自他不隔於毫端十
世古今始終不離於當念也至若三變淨土
意顯穢即是淨娑婆即華藏目前全是實相
真境故光中諸國皆七寶莊嚴也初一光顯
示次三周開示今此會指示乃盡佛之知見

耳此正極諸佛之神力發揚此事所謂長者并會國王親族將付家業一大事因緣圓會於此非特爾也

爾時十方諸佛各告衆菩薩言善男子我今應往娑婆世界釋迦牟尼佛所并供養多寶如來寶塔

此十方諸佛因光召爾將集也

時娑婆世界即變清淨琉璃為地寶樹莊嚴黃金為繩以界八道無諸聚落村營城邑大海江

河山川林藪燒大寶香曼陀羅華徧布其地以寶網幔羅覆其上懸諸寶鈴唯留此會衆移諸天人置於他土

此變土以容分身諸佛所謂示真實相也一真法界本無淨穢但隨心轉變以娑婆穢土原是華藏只以染惡衆生所集故穢惡充滿土石諸山高下不平二乘不達唯心安生欣厭取捨以見心外有法故一向執取涅槃不起一念度生之心故怖之如牢獄畏之如桎

枯是未見穢土本淨衆生本空耳今如來此
會特為指示佛之知見只欲了達一真平等
法界明悟心境皆真徹見諸法實相是則三
周開示乃開方便門今多寶出現三變淨土
所謂示真實相也然娑婆本淨但衆生無明
覆心智光未發故妄見其穢今佛放白毫光
徧照十方顯示唯心境界開佛知見則剎塵
心念皆佛出興即此穢邦變成淨土故經云
容受分身諸佛故三變淨土也淨穢唯心不

假餘力但因光照而云即變顯此娑婆即是
華藏故琉璃為地寶樹莊嚴等一真平等故
無諸聚落山川等總入神通大光明藏故燒
大寶香是為衆生成佛因地故華布其地萬
行彌滿皆是法音故寶網羅覆懸諸寶鈴衆
生本空故移諸天人置於他土苟開佛知見
則當下情忘頓見實相真境矣昔華嚴會上
二乘如盲今則分明顯現目前是所謂示佛
知見也

是時諸佛各將一大菩薩以為侍者至娑婆世界各到寶樹下一一寶樹高五百由旬枝葉華果次第莊嚴諸寶樹下皆有師子之座高五由旬亦以大寶而校飾之爾時諸佛各於此座結跏趺坐如是展轉徧滿三千大千世界而於釋迦牟尼佛一方所分之身猶故未盡

此東方分身諸佛來集也諸佛各將一大菩薩以為侍者意顯果因一契也寶樹高五百由旬寶座高五由旬意明開佛知見則念念

佛現不離五蘊身心也諸佛各於此座結跏趺坐者所謂不離當處也徧滿三千大千世界一方所分之身猶故未盡者意顯重重無盡也

時釋迦牟尼佛欲容受所分身諸佛故八方各更變二百萬億那由他國皆令清淨無有地獄餓鬼畜生及阿修羅又移諸天人置於他土所化之國亦以琉璃為地寶樹莊嚴樹高五百由旬枝葉華果次第嚴飾樹下皆有寶師子座高

五由旬種種諸寶以為莊校亦無大海江河及
目真鄰陀山摩訶目真鄰陀山鐵圍山大鐵圍
山須彌山等諸山王通為一佛國土寶地平正
寶交露幔徧覆其上懸諸幡蓋燒大寶香諸天
寶華徧布其地釋迦牟尼佛為諸佛當來坐故
復於八方各更變二百萬億那由他國皆令清
淨無有地獄餓鬼畜生及阿修羅又移諸天人
置於他土所化之國亦以琉璃為地寶樹莊嚴
樹高五百由旬枝葉華果次第莊嚴樹下皆有

寶師子座高五由旬亦以大寶而校飾之亦無
大海江河及目真鄰陀山摩訶目真鄰陀山鐵
圍山大鐵圍山須彌山等諸山王通為一佛國
土寶地平正寶交露幔徧覆其上懸諸幡蓋燒
大寶香諸天寶華徧布其地

此二變三變淨土將廓法界真境也前初變
淨土業已通變娑婆而為一淨土矣但容東
方所分身佛已充滿其中似無容針之地矣
尚不能盡是一方之佛有餘而全土之境不

足則分身之多可知今於娑婆之外八方各
更變二百萬億那由他國皆令清淨是則境
又不止一娑婆也問曰華藏界中獨一娑婆
而為穢土以有三惡道穢惡充滿其餘佛土
悉皆清淨今娑婆之外所更變者皆有三途
人天且隱惡道而移人天又似娑婆同土也
且前已通變而東方諸佛已充滿矣今更三
變者果何土耶答曰此意甚深是顯法界無
邊以明衆生妄緣無盡也然娑婆一土釋迦

化境常言三千大千世界而已諦觀滿慈得
記以恒河沙等三千大千世界為一佛土是
知娑婆非止一三千大千而已以衆生迷本
法界真心全體變為無明妄想是迷則徧迷
乃全變法界而為衆生界也斯則衆生充滿
法界豈一娑婆可能容受哉所謂恒河沙等
三千大千通為一土是也然各隨所見局為
一土耳故華藏通多淨土者以隨諸佛菩薩
淨心所見以即迷為悟故即穢而淨以隨衆

生安心所見故即淨而穢今令衆生開佛知見是即迷返悟故即無量劫來生死妄想今一念全體轉為諸佛智用故釋迦十方分身來集之象也以妄想無盡故佛亦無邊然境隨心變今真心既轉而真境隨轉所以娑婆之外八方各更變二百萬億那由他國土將廓法界之量今且猶是分轉非全轉也若全轉者豈有方向名數哉今以無盡妄想轉為佛智則宜乎佛多而境迫豈一娑婆可能容

受哉然三變文云為諸佛當來坐故復於八方各更變二百萬億等是知衆生今已開佛知見則妄想永絕自今念念諸佛現前是為諸佛當來坐也問曰所云全迷法界今既開悟即當一時全轉何假三變淨土次第而然耶答曰此正顯如來有大方便引攝衆生之意以衆生垢重不能頓見法界全體故向設三乘之權引令漸進然執權之徒知見狹劣如來不敢遽以全體示之所謂若說是事皆

當驚疑恐其驚怖而不信故說無量種種方便而引導之然今雖信佛心而猶未見實相真境故假三變淨土以示之然初變娑婆者以二乘一向但見三界生死可怖故生厭離而求涅槃不敢復入此正衆生知見也今示娑婆即是淨土以破二乘欣厭取舍之心也次於八方各更變者是引二乘趣向法界欲令捨權從實前至寶所不生退怯之心也次為諸佛當來坐故於八方各更變二百萬億

等者乃引權教菩薩令入究竟佛慧也將窮法界實際乃今姑為三乘者解略示少分而已豈能盡舉全體大用哉是知已變之外淨土不可思議正是諸佛功德無量無邊諸佛智慧甚深無量者此耳前云其智慧門難解難入若非如來善巧開示廣大神力以多寶之事而略示之則智慧門終竟難解難入也即今變土集佛之事二乘何從而知解耶此所謂示佛知見也明矣然所變之土皆云寶

華徧布其地乃明示此佛知見為成佛真因也

爾時東方釋迦牟尼所分之身百千萬億那由他恒河沙等國土中諸佛各各說法來集於此如是次第十方諸佛皆悉來集坐於八方爾時一一方四百萬億那由他國土諸佛如來徧滿其中是時諸佛各在寶樹下坐師子座皆遣侍者問訊釋迦牟尼佛各齎寶華滿掬而告之言善男子汝往詣耆闍崛山釋迦牟尼佛所如我

辭曰少病少惱氣力安樂及菩薩聲聞眾悉安隱不以此寶華散佛供養而作是言彼某甲佛與欲開此寶塔諸佛遣使亦復如是

此言東方分身諸佛既集則十方次第而集也娑婆之外二三各變二百萬億佛土故八方各四百萬億今已徧滿意顯佛身充滿塵塵刹刹無盡無盡也諸佛各在寶樹下坐師子座者所謂而恒處此菩薩座也各遣侍者問訊釋迦佛佛未親見者所謂法身無有彼

此迭相見故各齎寶華滿掬供佛者顯此妙法為成佛真因故問訊之辭以見釋迦示現與民同病之意也

爾時釋迦牟尼佛見所分身佛悉已來集各各坐於師子之座皆聞諸佛與欲同開寶塔即從座起住虛空中一切四眾起立合掌一心觀佛於是釋迦牟尼佛以右指開七寶塔戶出大音聲如却關鑰開大城門即時一切眾會皆見多寶如來於寶塔中坐師子座全身不散如入禪

定又聞其言善哉善哉釋迦牟尼佛快說是法華經我為聽是經故而來至此爾時四眾等見過去無量千萬億劫滅度佛說如是言歎未曾有以天寶華聚散多寶佛及釋迦牟尼佛上

此釋迦開多寶塔以示法身出現也佛身如空無所依以塔在虛空而釋尊欲開寶塔亦住虛空者示法身體同之象也以右指開七寶塔戶示自性開發不勞餘力也如却關鑰開大城門者歷劫堅固無明妄想忽然迸裂

法身頓現宗門所謂因地一聲也衆會皆見
多寶如來全身不散如入禪定者示衆生自
性開發則現前五蘊身心頓見法身全體顯
現心境當處寂滅之象也為聽是經而來至
此者以所說妙法深契法身真際也衆喜散
華者各示真因之象也

爾時多寶佛於寶塔中分半座與釋迦牟尼佛
而作是言釋迦牟尼佛可就此座即時釋迦牟
尼佛入其塔中坐其半座結跏趺坐爾時大衆

見二如來在七寶塔中師子座上結跏趺坐各
作是念佛坐高遠惟願如來以神通力令我等
輩俱處虛空即時釋迦牟尼佛以神通力接諸
大衆皆在虛空

此多寶分座釋迦入塔共坐者示五蘊緣生
之佛與法身同體真應不二之象也大衆見
二如來作念佛座高遠俱願處空者正顯二
乘向以佛道長遠為怖今佛知見既開則真
見遠而不遠俱願親近佛地可期之象也佛

以神力接衆在空者顯二乘人非佛神力方便接引無由得近佛慧也四十年來接引之功乃取効於今日耳豈小緣哉

以大音聲普告四衆誰能於此娑婆國土廣說妙法華經今正是時如來不久當入涅槃佛欲以此妙法華經付囑有在

此言護念付囑之事也妙法華經如來護念之法也能持此經則為護念之人矣苟有持者則此法付囑有在如來出世本懷為一大

事唯此而已故法若有所付則大事畢矣所謂唯此一事更無餘事故云不久當入涅槃正如長者將終若得其子委付家業志願畢矣由是觀之佛祖接人直可得到法身邊若法身向上事則當於佛未出世祖未西來時薦取不待今也

爾時世尊欲重宣此義而說偈言

聖主世尊雖久滅度在寶塔中尚為法來諸人云何不勤為法此佛滅度無央數劫處處聽法

以難遇故彼佛本願我滅度後在在所往常為
聽法又我分身無量諸佛如恒沙等來欲聽法
及見滅度多寶如來各捨妙土及弟子衆天人
龍神諸供養事令法久住故來至此為坐諸佛
以神通力移無量衆令國清淨諸佛各各詣寶
樹下如清淨池蓮華莊嚴其寶樹下諸師子座
佛坐其上光明嚴飾如夜闇中然大炬火身出
妙香徧十方國衆生蒙熏喜不自勝譬如大風
吹小樹枝以是方便令法久住告諸大衆我滅

度後誰能護持讀說斯經今於佛前自說誓言
其多寶佛雖久滅度以大誓願而師子吼多寶
如來及與我身所集化佛當知此意諸佛子等
誰能護法當發大願令得久住其有能護此經
法者則為供養我及多寶此多寶佛處於寶塔
常遊十方為是經故亦復供養諸來化佛莊嚴
光飾諸世界者若說此經則為見我多寶如來
及諸化佛諸善男子各諦思惟此為難事宜發
大願諸餘經典數如恒沙雖說此等未足為難

若接須彌擲置他方無數佛土亦未為難若以
足指動大千界遠擲他國亦未為難若立有頂
為衆演說無量餘經亦未為難若佛滅後於惡
世中能說此經是則為難假使有人手把虛空
而以遊行亦未為難於我滅後若自書持若使
人書是則為難若以大地置足甲上升於梵天
亦未為難佛滅後於惡世中暫讀此經是則
為難假使剗燒擔負乾草入中不燒亦未為難
我滅度後若持此經為一人說是則為難若持

八萬四千法藏十二部經為人演說令諸聽者
得六神通雖能如是亦未為難於我滅後聽受
此經問其義趣是則為難若人說法令千萬億
無量無數恒沙衆生得阿羅漢具六神通雖有
是益亦未為難於我滅後若能奉持如斯經典
是則為難我為佛道於無量土從始至今廣說
諸經而於其中此經第一若有能持則持佛身
諸善男子於我滅後誰能受持讀誦此經今於
佛前自說誓言

此聖主下十句頌因多寶勉衆意在得人付
囑也彼佛下四句頌多寶本願又我下十二
句頌化佛來集為證妙法欲令久住故為坐
下四句頌三變淨土諸佛各各下十八句頌
諸佛畢集歎美容儀淨妙如清池蓮華光明
照耀如夜炬火妙香普熏衆生觸者心喜神
悅如大風吹小樹枝言披靡傾倒喜不自持
也諸佛來儀如此為令妙法久住故告諸大
衆下十四句求持法之人能護持者當自發

願多寶與我及諸化佛當作證也諸佛子等
下二十句再求能持說者則為見我及供多
寶并諸化佛也所以再三求持經者既已開
示佛之知見貴在能持使佛種不斷若視為
尋常則有負如來今日之大事因緣也持經
必教發願者以惡世難持欲令信力堅固不
得遇緣生退怯耳故下文歷言其難諸善男
子下八句令諦思此經難持不若諸經之易
易慎勿輕忽故令發願而後持也若接須彌

下十六句言說經之難若手接須彌指動大千固已為難而神通者能之有頂諸天智慧難越而慧辯過勝者亦能超之唯有此經於惡世中最為難說以人多弊惡多怨難信故也假使有人下言書難虛空難把楞嚴阿難既悟則觀十方虛空如手持葉物是則虛空猶可把也若此經者寂滅離言之道豈得而書之耶是以書之為難也若以大地下八句讀難大地至重梵天至高足甲至微置大地

於足甲而昇梵天神通廣大者不難不若惡世讀此經為難也假使下八句持難負乾草入劫火而不燒亦未為難惡世衆生暴惡煩惱火中能持此經是為難也若持八萬下聽難八萬四千法藏以文言敷演何足為難獨此經之實相無量義趣而能聽聞是為難也若夫說法下十二句奉難若有人善說法令諸聞者得羅漢六通此亦未難能持此經即得菩提故為難耳我為佛道下八句顯所以

難言我自成佛以來從始至今於無量土所
說諸經蓋無量矣皆隨機之談獨有此經示
一乘佛性凡有持者疾得菩提故為第一若
能持此經則全持佛身慧命不斷然非大根
堅固忍力實難持也諸善男子下六句令持
者發誓只欲堅其願力也上通頌難持
此經難持若變持者我則歡喜諸佛亦然如是
之人諸佛所歎是則勇猛是則精進是名持戒
行頭陀者則為疾得無上佛道能於來世讀持

此經是真佛子住淳善地佛滅度後能解其義
是諸天人世間之眼於恐懼世能須臾說一切
天人皆應供養

此頌難持能持故我及諸佛歡喜讚歎也然
持此經非紙墨文字之謂也要亡言得旨頓
契佛心是為勇猛精進則是總持萬行頓斷
煩惱故為持戒頭陀不歷多劫頓登佛地所
以整持即有如是利益也能於來世下八句
承上利益故惡世能持是真佛子能解其義

則為世間眼目以開佛知見也於恐畏下四句結能說者當如供佛也問曰多寶證法化佛畢集世尊更無他說獨以持經苦口叮嚀再三四者何也答曰以佛知見衆生之迷固已久矣遠自大通塵劫來一向迷之而不悟已費吾佛生生世世隨之教化業經無量不可思議劫數矣直至今日猶勞四十年之方便開示現前信解者幾何人哉是謂佛法之難遇也如此今既開示若不堅力持之則

恐此後一失又不知更經塵點之劫未審可如今日之聽聞也若此法失持則佛種斷絕豈細事哉正如大富長者創業艱難刻苦累世而致富有家業苟無克家之子而持守之若一旦散失難求再昔也此其世尊苦口叮嚀再三勸持者蓋此意也已前十品通為開示佛之知見總名信解故向後諸品多言持經之功以顯悟佛知見既悟守之為難也

妙法蓮華經提婆達多品第十二

此品來意連下十品通為悟佛知見也以前
三周開示為開佛知見諸二乘人但信此心
而已雖信心真未達境妙故現寶塔一品直
示境妙名為示佛知見此下名為悟佛知見
者以諸聲聞雖信自心作佛猶有歷劫無明
未盡從來狹劣知見習氣未忘雖云信解猶
屬知解故須多方妙行調治乃得法身淳淨
抑恐此輩涉俗利生不善方便故預示種種
守護之方由從妙行乃得悟入使其不墮凡

情不生驚怖此正如來廣大慈悲所謂預留
醫方之意也向下通顯行證臨文各有所屬
此判悟之之初而以提婆達多名品者以顯
悟有難易以行為本也以諸聲聞久懷佛道
長遠之怖故不起一念好樂之心今雖蒙授
記且又經歷多劫乃得證果抑恐引起宿習
不肯勤求故世尊自引本事雖為國王乃不
惜身命而求妙法由此苦行遂至今日得證
菩提此悟之難乃漸悟也又恐下劣之輩畏

難而不進故又說文殊所化七歲龍女成佛
之事以見其易且海為生死沉溺之地龍乃
三毒之首女為陰邪垢濁之器此最難化者
而獻珠之頃當下成佛何其易易耶此頓悟
也良以親近大智為依歸故意令當機於佛
滅後當親最勝知識可保妙悟之極永不墮
二乘之地故悟之首以立漸頓故此品來也
爾時佛告諸菩薩及天人四眾吾於過去無量
劫中求法華經無有懈倦於多劫中常作國王

發願求於無上菩提心不退轉為欲滿足六波
羅蜜勤行布施心無吝惜象馬七珍國城妻子
奴婢僕從頭目髓腦身肉手足不惜軀命時世
人民壽命無量為於法故捐捨國位委政太子
擊鼓宣令四方求法誰能為我說大乘者吾當
終身供給走使時有仙人來白王言我有大乘
名妙法華經若不違我當為宣說王聞仙言歡
喜踊躍即隨仙人供給所須采果汲水拾薪設
食乃至以身而為床座身心無倦於時奉事經

於千歲為於法故精勤給侍令無所之
此佛自叙往昔勤求妙法之難以警二乘懈
怠之心也言無量劫中求法華經無有懈怠
者則求法之心非一劫矣況多劫中常作國
王而勤求之又非尋常之人矣且為求法故
象馬等外施也頭目等內施也捐捨國位則
一切施也然有說妙法者願終身走使伏勞
忍苦忘我之至也特有仙人應求而為說則
精誠所感也王聞即歡喜隨侍執勞而不厭

乃至以身為床座而不倦且經千歲長時而
不辭給侍周足此求法之心何其勤苦長遠
耶且現前二乘之人得授記者各人自揣求
法之心曾有如是之精誠乎是則我今為說
法王大寶諸人不求而自至豈可尋常易視
哉是則將來歷事多佛固應體我如是之心
方名持法之人也古云既悟守之為難苟無
克苦堅強何以得成聖果故首告悟心以此
爾時世尊欲重宣此義而說偈言

我念過去劫為求大法故離作世國王不貪五
欲樂椎鐘告四方誰有大法者若為我解說身
當為奴僕時有阿私仙來白於大王我有微妙
法世間所希有若能修行者吾當為汝說時王
聞仙言心生大喜悅即便隨仙人供給於所須
采薪及果蔬隨時恭敬與情存妙法故身心無
厭倦普為諸衆生勤求於大法亦不為己身及
以五欲樂故為大國王勤求獲此法遂致得成
佛今故為汝說

我念過去下二十二句通頌世尊徃昔所求
之精勤也阿私陀此云無比乃佛過去之本
師若法有比則不能令求者忘身至此也普
為諸衆生下八句頌昔求法之難而今為衆
說之易也欲令大眾知所重故

佛告諸比丘爾時王者則我身是時仙人者今
提婆達多是由提婆達多善知識故令我具足
六波羅蜜慈悲喜捨三十二相八十種好紫磨
金色十力四無所畏四攝法十八不共神通道

力成等正覺廣度衆生皆因提婆達多善知識
故

此佛述昔師仙人為今提婆達多正示刻苦
為成佛之因也提婆達多此云天熱生時人
天心皆熱故以為名又母禱天而生故亦云
天授斛飯王之子佛之從弟然事逆行世世
專意害佛今則更甚常以毒藏十指甲禮佛
接足足不傷而指自壞又與阿闍世王謀欲
殺佛而自為新佛王縱五百醉象踏佛佛以

手指指現師子象皆懾伏又推大石壓佛地
神遮之石碎逆其小者中佛足流血因是陷
入地獄佛遣使問其安否報曰我處此如四
禪天樂又問幾時出地獄答曰待世尊來入
地獄我方出之其五逆類如此害之非一世
也今云提婆即昔說妙法之仙人而言由提
婆達多善知識故令我具足六波羅蜜慈悲
喜捨等所以得成正覺廣度衆生者皆因提
婆達多善知識故是則如來今日佛果皆因

提婆而成其恩重不可言矣其實皆以怨害
世尊歸重如此者足知佛果難成所謂或示
怨家以怨害折磨堅其精進不退之忍力非
此何以得至今日哉所謂彼一闡提非一闡
提世間解脫誰轉世尊述此蓋因前品極言
持法之難以惡世多怨故欲二乘得記之人
將來持經處於惡世當觀如來因提婆之怨
害得成菩提然後乃能無退怯心即取佛果
無難故當悟守之初必若佛事提婆為嘉範

然後方能令法久住也

告諸四衆提婆達多却後過無量劫當得成佛
號曰天王如來應供正徧知明行足善逝世間
解無上士調御丈夫天人師佛世尊世界名天
道時天王佛住世二十中劫廣為衆生說於妙
法恒河沙衆生得阿羅漢果無量衆生發緣覺
心恒河沙衆生發無上道心得無生忍至不退
轉時天王佛般涅槃後正法住世二十中劫全
身舍利起七寶塔高六十由旬縱廣四十由旬

諸天人民悉以雜華末香燒香塗香衣服瓔珞
幢幡寶蓋伎樂歌頌禮拜供養七寶妙塔無量
衆生得阿羅漢果無量衆生悟辟支佛不可思
議衆生發菩提心至不退轉

此與提婆達多授記而不列於諸弟子中者
以是世尊本師故且以磨礪砥行堅固如來
之忍力以成菩提故居悟守之首而為惡世
持經之範也佛號天王者謂由怨害令佛強
忍以至天然而得大自在故感果如之國名

天道者謂佛佛成道未有不由忍苦而成自
然之理也常說妙法蓋因中始以妙法教釋
尊故果上常說而衆生聞妙法俱得三乘之
果者正示法一而機異也時天王佛滅後供
塔之人皆得三乘之果者亦由因行所感也
佛告諸比丘未來世中若有善男子善女人聞
妙法華經提婆達多品淨心信敬不生疑惑者
不墮地獄餓鬼畜生生十方佛前所生之處常
聞此經若生人天中受勝妙樂若在佛前蓮華

化生

此言未來有聞此品信敬而不疑者則永不墮三途乃至若在佛前蓮華化生者以見世尊求法之難多怨成就之力而於妙法精持堅忍不退之益故獲如此之勝報也

於時下方多寶世尊所從菩薩名曰智積白多寶佛當還本土釋迦牟尼佛告智積曰善男子且待須臾此有菩薩名文殊師利可與相見論說妙法可還本土

此下方智積請多寶佛當還本土者以證法事畢不宜久任意表證悟未忘猶存法執必返一絕跡兩忘能所方為妙悟宗門所謂悟之一字亦須吐却乃返本還源之象也釋迦留之以待文殊者表以所悟妙法融為觀照消磨法執方盡持法之妙也故待文殊可與相見論說妙法

爾時文殊師利坐千葉蓮華大如車輪俱來菩薩亦坐寶蓮華從於大海娑竭羅龍宮自然涌

出住虛空中詣靈鷲山從蓮華下至於佛所頭
面敬禮二世尊足修敬已畢往智積所共相慰
問却坐一面

此言文殊坐寶蓮華從海涌出者表悟心者
如蓮華開妙智現前藏識海中挺然獨露也
至於佛所禮二尊足者始覺之智合乎本覺
之象也往智積所共相慰問者二智冥會之
象也非此不足以言妙悟

智積菩薩問文殊師利仁往龍宮所化衆生其

數幾何文殊師利言其數無量不可稱計非口
所宣非心所測且待須臾自當證知所言未竟
無數菩薩坐寶蓮華從海涌出詣靈鷲山住在
虛空此諸菩薩皆是文殊師利之所化度且菩
薩行皆共論說六波羅蜜本聲聞人在虛空中
說聲聞行今皆修行大乘空義文殊師利謂智
積曰於海教化其事如是

此問文殊所化之衆言其數無量不可稱計
者謂生死大海三毒窟宅非大智不能深入

非妙法不能轉煩惱而為妙行也以智起惑
忘則無數煩惱當體清淨故無數菩薩坐寶
蓮華詣靈鷲山住在空中也煩惱一轉則一
切行皆是佛行故皆修行大乘空義也故文
殊曰我於海教化其事如是
爾時智積菩薩以偈讚曰
大智德勇健化度無量衆今此諸大會及我皆
已見演暢實相義開闡一乘法廣導諸衆生令
速成菩提

此智積偈讚文殊初四句謂非大智勇健不
能化此多衆次四句謂非妙法不能轉變如
此之速

文殊師利言我於海中唯常宣說妙法華經
此文殊重答前偈謂唯常宣說妙法華經更
無別法意顯妙法成就之速故下問可有速
得成佛之人

智積問文殊師利言此經甚深微妙諸經中寶
世所希有頗有衆生勤加精進修行此經速得

佛不

智積重問文殊言妙法甚深可有衆生依之
修行速得佛否此問要顯妙法之功甚速故
爾

文殊師利言有娑竭羅龍王女年始八歲智慧
利根善知衆生諸根行業得陀羅尼諸佛所說
甚深秘藏悉能受持深入禪定了達諸法於刹
那頃發善是心尋不見身非
猶如赤子功德具足一念口演微妙廣大慈悲

仁讓志意和雅能至菩提智積菩薩言我見釋
迦如來於其量則佳于若于責功累德求菩提
道未曾止息觀三千大千世界乃至無有如芥
子許非是菩薩捨身命處為衆生故然後乃得
成菩提道不信此女於須臾頃便成正覺

此文殊深讚八歲龍女利根依此妙法修行
而能即至菩提此其人也海中異類三毒穢
濁柔弱女身而能具如是勝妙之德者正顯
生死垢濁煩惱之體本是成佛智用也故云

能至菩提且云刹那發心即得不退者所謂
一念轉移之力也此實常情所難信故智積
生疑釋迦多劫修因乃得菩提何以龍女須
更便成正覺所謂得其旨者等諸佛於刹那
失其門者徒修因於曠劫正顯妙法勝能非
項久淨穢之情可計也

言論未訖時龍王女忽現於前頭面禮敬却住
一面以偈贊曰

深達罪福相徧照於十方微妙淨法身具相三

十二以八十種好用莊嚴法身天人所戴仰龍
相威恭敬一切眾生真不宗奉者又聞我菩
提唯佛當證知我聞大乘教度脫苦眾生

此龍女現證以消狹劣滯相之執也執釋迦
之久修見龍女之罪垢是皆不達罪福性空
唯文殊大智徧照則了無異相一際平等何
遲速之有哉我聞大乘教度脫苦眾生意在
唯持妙法以度眾生也

時舍利弗語龍女言汝謂不久得無上道是事

難信所以者何女身垢穢非是法器云何能得
無上菩提佛道懸曠經無量劫勤苦積行具修
諸度然後乃成又女人身猶有五障一者不得
作梵天王二者帝釋三者魔王四者轉輪聖王
五者佛身云何女身速得成佛

此身子生疑正宗二乘執相之見也如身子
所見女身五障絕無成佛之分此蓋常情所
共執以不達去生本空之理其言身有五障之有
知此可入平等實相矣

爾時龍女有一寶珠價直三千大千世界持以
上供供即受之竟下問智責菩薩尊者舍利弗
言我獻寶珠世尊納受是事疾不答言甚疾女
言以汝神力觀我成佛復速於此當時眾會皆
見龍女忽然之間變成男子具菩薩行即往南
方無垢世界坐寶蓮華成等正覺三十二相八
十種好普為十方一切眾生演說妙法
此龍女自示成佛之速也龍之所鍾愛者珠
今龍女獻珠之頃當下成佛者表能頓斷法

愛則佛性現前所謂稟明於心不假外也龍
女忽然變成男子者示佛性無常了無男女
之相正破二乘執相之執也即往南方言明
正為南表離無明暗則藏性頓顯佛體現前
即往南方無垢世界坐寶蓮華成等正覺也
以從妙法得悟故普為衆生演說妙法因身
子生疑故龍女即變男子當下成佛所以激
發二乘正謂個個大丈夫不答一語也
爾時娑婆世界菩薩聲聞天龍八部人與非人

皆遙見彼龍女成佛普為時會人天說法心大
歡喜共道歡禮其量及生用去屏吾得不退專
無量衆生得授道記無垢世界六反震動娑婆
世界三千衆生住不退地三千衆生發菩提心
而得授記智積菩薩及舍利弗一切衆會默然
信受

此法會蒙益也無垢世界六種震動者轉染
令淨頓悟唯心之象也娑婆衆生住不退地
而得授記者因龍女激發而獲勝益智積身

于大衆之疑頓釋故默然信受以此品顯示
堅固當如釋迦之精勤自無疲厭之心知龍
女之速證菩提自無佛道長遠之怖此世尊
以是方便教菩薩也

妙法蓮華經持品第十三

此品來意由前當機開解已得授記猶歷多
劫成佛世尊慮恐小乘狹劣習氣未除復生
佛道長遠之怖乃自叙往昔去之難以前
疲倦之心復以龍女當下成佛之事以發欣

慕之願故次之以持品者蓋此經是諸佛之
慧命為衆生且因之侶性若如天滅後人
弊惡最難奉持苟失其持則佛種斷絕此世
尊之隱憂也故諸菩薩默領佛意安慰世尊
願不有慮各願奉持廣說此經不惜身命也
而五百弟子與學無學人亦領佛意亦各願
於餘國廣宣此經以娑婆國土人多上慢自
量其力不能化度故也時佛姨母等諸比丘
尼向來自視女身多障不敢希望佛果今見

龍女成佛之易亦自信成佛有分故請世尊
特為授記因亦願於他國廣宣此經以見不
退之心也爾時世尊乃視八十億那由他菩
薩而不言者意謂諸聲聞人雖願持經而未
習涉俗利生之行不知遠害之方法力不充
恐被留難使法緣不廣欲諸菩薩以調護之
故諸菩薩默領佛意齊發誓願於如來滅後
周旋往返十方世界唯以忍行受持此經然
非已力皆是如來神力以守護之此乃將導

初心所以安慰如來願不有慮也然品以持
名者持謂守其所有而不失之意猶世俗所
謂守業為難也譬如大富長者盡以家業委
付其子僕一失守則祖脉斷絕豈細事哉故
此品經文單說持經之事以明悟守之難故
此品來也

爾時藥王菩薩摩訶薩及大樂說菩薩摩訶薩
與二萬菩薩眷屬俱皆於佛前作是誓言惟願
世尊不以為慮我等於佛滅後當奉持讀誦說

此經典後惡世衆生善根轉少多增上慢貪利
供養增不善根遠離解脫雖難可教化我等當
起大忍力讀誦此經持說書寫種種供養不惜
身命爾時衆中五百阿羅漢得受記者白佛言
世尊我等亦自誓願於異國土廣說此經復有
學無學八千人得受記者從座而起合掌向佛
作是誓言世尊我等亦當於他國土廣說此經
所以者何是娑婆國中人多弊惡懷曾上慢功
德淺薄瞋濁諂曲心不實故

此因世尊前來極言此經難持而諄諄激勸
且云誰能護持此經自說誓願故藥王藥訖
發願奉持也以藥王忘身捨執樂說具樂說
辯所謂以不懈怠心乃能持耳故首衆發願
世尊所慮末世難持此經者以人多弊惡故
藥王願持先述弊惡之人以善根轉少難可
教化若欲持經當起大忍力不惜身命此正
領前如來教以入如來室等及給使仙人求
法之勤苦如此乃可能持也以二大士激勵